

CONVENIO DE COLABORACION ENTRE O SERVIZO GALEGO DE SAÚDE (XERENCIA DE XESTION INTEGRADA DE OURENSE, VERIN E O BARCO DE VALDEORRAS) E A FUNDACION DORZAN PARA PRESTAR APOIO NO COMPLEXO HOSPITALARIO UNIVERSITARIO DE OURENSE MEDIANTE O PROGRAMA "PREPARANDO A VOLTA A CASA"

Ourense a 29 de outubro de 2018

REUNIDOS:

Dunha parte, **D. Jesús Vázquez Almuiña**, conselleiro de Sanidade e presidente do Servizo Galego de Saúde, de acordo co establecido no artigo 34 da Lei 1/1983, do 22 de febreiro, de normas reguladoras da Xunta e da súa Presidencia, modificada pola Lei 11/1988, do 20 de outubro e pola Lei 12/2007, do 27 de xullo, de conformidade cos Decretos 41/2013 de 21 de febreiro (modificado por Decreto 33/2014, de 6 de marzo) e 43/2013, do 21 de febreiro, polos que se establecen as estruturas orgánicas da Consellería de Sanidade e do Servizo Galego de Saúde, respectivamente; así como co establecido na Lei 1/2016, de 18 de xaneiro de transparencia e bo goberno, así como co establecido na Lei 40/2015, de 1 de outubro, de Réxime Xurídico do Sector Público.

Doutra parte, **D. Juan Ramón Álvarez Blanco**, con DNI nº 34.227.473-T., Presidente da Fundación Dorzán, entidade de carácter benéfico-social, domiciliada en xxxxxxxx con C.I.F., G-32.280.752, Fundación constituída en escritura pública o día xxxxxxxx, ante o Notario de Ourense, D. xxxxxx, con número x do protocolo e clasificada como benéfico-social por Orde da Consellería da Presidencia e Administración Pública da xunta de Galicia, do 19 de outubro de 2001 (D.O.G. nº 210, do 30 de outubro) e declarada de interese galego, por Orde da Consellería de Sanidade o 14 de decembro de 2001 (D.O.G. nº 5, do 8 de xaneiro de 2002), figurando inscrita no Rexistro Único de Fundacións de Interese Galego, baixo o número xxxxx.

Ambas as dúas partes recoñécense con capacidade legal para obrigarse e subscribir este convenio, e para estes efectos.

EXPOÑEMOS:

A familia xoga un papel importantísimo no proceso de recuperación da autonomía e funcionalidade do doente motivándoo, estimulándoo e axudándoo a seguir as pautas dadas por todo o persoal implicado na asistencia hospitalaria.

Faise preciso lembrar que segundo os datos do Instituto Galego de Estadística mais do 30% da poboación de Ourense é maior de 65 anos e 12;3 % de todos os habitantes da provincia supera o 80 anos. Aínda que non existe un rexistro de persoas maiores que viven soas, estímase que máis dun 10 % da poboación vive soa e polo tanto carece de coidador.

Esta situación aparece reflectida nos servizos hospitalarios, nos que se fai preciso contar cun apoio familiar que facilite, por exemplo, o inicio do proceso de deambulación do paciente. Pero isto non sempre é posible xa que, en moitas ocasións, atópanse persoas que non contan co soporte social preciso e que, polo tanto, non poden acadar un grado de autonomía persoal que lles permita un pronto retorno ao seu domicilio.

Neste contexto social e sanitario e mediante o programa PREPARANDO A VOLTA A CASA preténdese que as persoas hospitalizadas contén cunha rede social de axuda, durante o seu ingreso hospitalario, que lles preste a asistencia axeitada para acadar a capacidade funcional e a autonomía necesaria que lles permita o regreso ao seu domicilio nas mellores condicións.

A Fundación DORZÁN é unha institución benéfico social que ten por obxecto a axuda e asistencia ao colectivo da terceira idade, coa fin de mellorar a súa calidade de vida e benestar social. Dentro das súas áreas de actuación está a de contribuír e costear a atención das persoas maiores, que por falta ou escaseza de recursos non poden acceder ás prestacións dun servizo de axuda externa, para desenvolver as actividades básicas da vida diaria.

Dende o 3 de novembro de 2017 e cunha vixencia de catro anos, a Xerencia de Xestión Integrada de Ourense, Verín e O Barco de Valdeorras e a Fundación Dorzán están a desenvolver o Convenio de Colaboración para prestar servizo de apoio domiciliario mediante o programa "VOLTA A CASA" . Coa sinatura deste novo Convenio trátase de prestar o servizo de apoio, durante o ingreso hospitalario do paciente e antes da alta médica, para poder garantir o retorno ao domicilio das persoas doentes nas mellores condicións físicas e psicolóxicas.

Por todo isto, sendo concorrente o interese das dúas partes, resulta conveniente a colaboración entre ambas, polo que acordan outorgar o presente convenio de colaboración sobre a base das seguintes:

CLAÚSULAS.

Primeira. Obxecto

Desde un punto de vista xeral, o obxecto do presente convenio é regular as condicións que deben darse para proceder a prestar apoio social aos doentes hospitalizados que o precisen de xeito temporal, e que, en moitos casos, contribúa ao retorno do paciente seu domicilio nas mellores condicións posibles e que continúe, nalgúns dos casos, con posterioridade á alta hospitalaria, no seu domicilio, co programa volta a casa segundo o estipulado no Convenio de Colaboración asinado entre o Servizo Galego de Saúde (Xerencia de Xestión Integrada de Ourense, Verín e o Barco de Valdeorras) e a Fundación Dorzán o 3 de novembro de 2017 .

Desde un punto de vista máis específico, as vantaxes que ofrece a posta en marcha deste convenio son as seguintes:

- * Romper o illamento do doente incorporando unha persoa que colabora con el e cos profesionais sanitarios, no proceso de recuperación da saúde.
- * Reforzar as indicacións facilitadas no proceso de recuperación funcional.
- * Motivación e rotura dunha actitude derrotista ante as dificultades no proceso de recuperación.

Segunda. Financiamento.

O custe da prestación do servizo, as persoas incluídas neste convenio de colaboración, será asumido na súa totalidade pola Fundación Dorzán, polo que ao non implicar compromiso de gasto para o Servizo Galego de Saúde non é preciso realizar consignación presupostaria.

Terceira . Perfil das persoas destinatarias.

Serán destinatarias da asistencia previstas no presente convenio de colaboración, aquelas persoas que reúnan os seguintes requisitos:

- Estar ingresado no Complexo Hospitalario Universitario de Ourense.
- Ter 60 anos cumpridos.
- Doentes intervidos de artoplastia de cadeira o fractura femoral, os que o servizo de traumatoloxía soliciten iniciar o proceso de deambulación e que teñan capacidade de recuperación da marcha.
- Doentes intervidos de cirurxía, con estancias y postoperatorios complicados que presenten debilidade muscular e teñan posibilidades de recuperala.
- Sen familia, nin rede de apoio que colabore co doente.
- Con parella de idade avanzada ou con dificultades para comprender ou colaborar no proceso de iniciar a deambulación.
- Doente que outorgue o seu consentimento por escrito, para que conte co apoio da auxiliar do programa.

Cuarta. Prestacións.

As atencións que se van prestar dende este servizo serán de apoio a mobilización de acompañamento e nunca serán de carácter sanitario.

Estas atencións serán prestadas por unha empresa de servizos sociosanitarios externa, seleccionada pola Fundación Dorzán, atendendo a criterios económicos e de calidade na prestación da atención.

O persoal unido á empresa prestadora do servizo, por medio dunha relación contractual ou de calquera outra índole, dependerá só e, exclusivamente, da devandita empresa, sen

que, en ningún caso, exista vínculo de dependencia entre o devandito persoal, coa Fundación Dorzán nin co Servizo Galego de Saúde, non sendo aplicable, polo tanto nin a denominada sucesión empresarial, nin ningunha figura de análoga natureza.

As obrigas sociais e laborais respecto ao persoal que aporta a empresa para prestar os apoios no domicilio corresponderán única e exclusivamente a esta empresa. A Xerencia de Xestión Integrada de Ourense, Verín e Barco de Valdeorras e o Servizo Galego de Saúde, manteranse alleos ás devanditas relacións laborais, de tal forma que non se lle poderá esixir responsabilidade algunha, nin directa nin subsidiaria por calquera incidencia acaecida no desenvolvemento do servizo.

Quinta. Obrigas do Servizo Galego de Saúde.

Correspóndelle ao Servizo Galego de Saúde, a través da Xerencia de Xestión Integrada de Ourense, Verín e Barco de Valdeorras, a formulación da solicitude de praza, que se levará a cabo do seguinte xeito:

O Servizo de Traballo social do Complexo Hospitalario Universitario de Ourense será o responsable de seleccionar e facer unha valoración precisa daquelas persoas que puideran precisar de dito recurso e realizar todas aquelas xestións e trámites necesarios para que poidan dispoñer o antes posible, dun recurso público si fora o caso.

O Servizo de Traballo Social formulará a solicitude de praza á Fundación Dorzán que irá acompañada da seguinte documentación:

-Modelo de solicitude do servizo, no que se farán constar expresamente as condicións xerais do servizo que deben ser aceptadas polo beneficiario, asinando dita solicitude.

Sexta. Obrigas da Fundación Dorzán.

Correspóndelle á Fundación Dorzán a aprobación da solicitude de praza, que se levará a cabo do seguinte xeito:

-Unha vez que se presentou a solicitude de praza, o Padroado da Fundación Dorzán resolverá coa maior brevidade a aprobación ou denegación. En todo caso, a aprobación da mesma por parte da Fundación Dorzán, estará condicionada polo esgotamento dos recursos anuais destinados a este programa.

-Aprobada a solicitude polo Padroado da Fundación Dorzán e antes de iniciar a prestación de apoio no domicilio do beneficiario, o Servizo de Traballo Social do Complexo Hospitalario Universitario de Ourense comunicarlle a empresa prestadora do servizo onde esta ingresado ó doente e fará a presentación da auxiliar ao doente e ao persoal sanitario para que lle dean as indicacións precisas.

A denegación da solicitude será inapelable e, en ningún caso, estará sometida a xustificación.

Sétima. Relacións e protección de datos de carácter persoal.

De conformidade co establecido no Regulamento (UE) 2016/679 do Parlamento Europeo e do Consello do 27 de abril de 2016 relativo á protección das persoas físicas no que respecta ao tratamento de datos persoais e á libre circulación destes datos e pola que se deroga a Directiva 95/46/CE así como o resto da lexislación vixente nesta materia, ambas partes comprométense a gardar a máis estrita confidencialidade respecto de calquera das informacións, datos e documentación de carácter persoal á que teñan acceso en virtude do presente convenio e ao deber de gardalos, sen que podan utilizalos para usos diferentes aos previstos o mesmo, fan constar, de maneira expresa, que velarán polo cumprimento da normativa de protección de datos persoais de aplicación en cada caso. Estas obrigas subsistirán incluso despois de finalizar as relacións negociables entre as partes.

1. As partes utilizarán ou aplicarán os datos persoais única e exclusivamente conforme ás finalidades e instrucións derivadas deste convenio, e non os comunicarán ou cederán a outras persoas, nin sequera para a súa conservación.

2. As partes adoptarán as medidas de seguridade, técnicas e organizativas, establecidas, na normativa vixente todo elo de cara a evitar a perda, mal uso, alteración, acceso non autorizado e roubo dos datos persoais, habida conta do estado da tecnoloxía, a natureza dos datos almacenados e os riscos a que estean expostos, xa proveñan da acción humana ou do medio físico ou natural.

3. As partes están obrigadas a gardar o segredo profesional respecto dos datos de carácter persoal que trate no cumprimento do convenio, obriga que subsistirá aínda cando finalice a vixencia do mesmo.

4. Unha vez que finalice a relación entre as partes, os datos de carácter persoal deberán ser destruídos ou devoltos, excepto no que a normativa e/ou decisións xudiciais puideran establecer con respecto ao mantemento temporal mínimo de certos datos, que pola súa natureza así se requira; o mesmo destino haberá de darse a calquera soporte ou documentos no que conste algún dato de carácter persoal obxecto do tratamento.

O incumprimento de calquera dos acordos anteriores será causa suficiente para a rescisión do presente convenio.

Oitava. Duración do Servizo.

O servizo prestarase a cada beneficiario de luns a venres, a razón dunha hora cada día, durante o tempo que dure a Hospitalización.

Este servizo, de apoio á mobilización de acompañamento, pode continuar no domicilio dos doentes si así se precisara e os Traballadores do Complexo Hospitalario Universitario de Ourense así o aconsellen, cando o enderezo sexa de Ourense cidade.

Naquelas situacións que poida preverse unha cronificación da situación, iniciaranse polo Servizo de Traballo Social do Complexo Hospitalario Universitario de Ourense, os procedementos oportunos para intentar garantir unha continuidade do servizo a cargo doutras entidades, servizos sociais comunitarios ou a través do sistema de atención á dependencia.

Novena. Comisión de Seguimento.

Constituirase a iniciativa de calquera das partes unha Comisión de seguimento do presente convenio, formada por dous representantes de cada unha das partes, que asumirá as seguintes funcións:

- Impulsar e avaliar o cumprimento do Convenio, propoñendo as actuacións que se consideren precisas.
- Interpretar, en caso de dúbida, o contido do presente convenio.
- Propoñer ás partes, a resolución das posibles controversias que puidieran xurdir na súa aplicación.

Esta comisión reunirse as veces que se estimen oportunas, para o cumprimento do presente convenio. O incumprimento por calquera das partes, das cláusulas do presente convenio, poderá dar lugar á denuncia deste.

Décima. Vixencia do Convenio.

O presente convenio terá vixencia de catro anos, dende o día seguinte ó da súa sinatura.

Non obstante, as partes de mutuo acordo poderán, en calquera momento antes da finalización do prazo previsto no apartado anterior, acordar a súa prórroga, por un período de ata catro anos adicionais, ou a súa extinción.

Décima primeira. Causas de resolución.

Son causas de resolución do presente convenio:

- A denuncia previa de calquera das dúas partes asinantes, sempre que o notifique á outra cun mes de antelación.
- O mutuo acordo entre as partes.
- O incumprimento, total ou parcial, dalgunha das cláusulas.

Décima segunda. Cuestións litixiosas.

Este convenio ten natureza administrativa e rexerase polo establecido nas súas estipulacións. No seu defecto, polo previsto na Lei 9/2017, de 8 de novembro, de Contratos do Sector Público, en particular os principios e criterios que a informan, para resolver as dúbidas e lagoas que puideran suscitarse na interpretación e aplicación do convenio.

As cuestión litixiosas que poidan xurdir durante a aplicación do convenio, resolveranse ante a Orde Xurisdiccional Contencioso-Administrativa.

Décima Terceira. Rexistro de Convenios, transparencia e bo goberno.

A firma deste Convenio de colaboración leva implícito o consentimento expreso das persoas intervinientes para que a Administración Pública autonómica galega poida facer públicos os datos de carácter persoal que figuren nel, de acordo co disposto na Lei 19/2013, do 9 de decembro, de transparencia, acceso á información pública e bo goberno, e a Lei Galega 1/2016, do 18 de xaneiro, de transparencia e bo goberno.

En proba da súa conformidade, asínase polas partes o presente Convenio en triplicado exemplar.

O Presidente do Servizo Galego de Saúde
(P.D. de data 25 de outubro de 2018)
Xerente da Xerencia de Xestión Integrada
de Ourense, Verín e Barco de Valdeorras

O Presidente da Fundación Dorzán

D. Julio García Comesaña -

D. Juan Ramón Álvarez Blanco.

ANEXO I

CONSENTIMIENTO INFORMADO

En cumprimento do disposto na normativa vixente en materia de Protección de Datos:

D./Dña.

con D.N.I.

Como paciente do Complexo Hospitalario Universitario de Ourense da Xerencia de Xestión Integrada Ourense, Verín e o Barco de Valdeorras, libre e voluntariamente DECLARO que fun debidamente INFORMADO polo persoal do Servizo de Traballo Social do Complexo Hospitalario Universitario de Ourense, sobre a existencia e natureza do programa de apoio hospitalario "PREPARANDO A VOLTA A CASA" que a FUNDACIÓN DORZÁN en colaboración co SERVIZO GALEGO DE SAÚDE pon á miña disposición, e en consecuencia AUTORIZO que os meus datos persoais, e os datos sanitarios que se consideren necesarios para a formulación da solicitude de inclusión no citado programa, sexan enviados á FUNDACIÓN DORZÁN.

Ourense, a..... de de

PACIENTE

RESPONSABLE DO SERVIZO DE TRABALLO SOCIAL

Asdo.:

Asdo.:

De conformidade coa lexislación vixente, este CONSENTIMIENTO poderá ser REVOGADO polo paciente en calquera momento.

Ourense, a..... de de.....

PACIENTE

RESPONSABLE DO SERVIZO DE TRABALLO SOCIAL

Asdo.:.....

Asdo.: